

[VIII]

Matronae procul hinc abite castae:

turpe est vos legere inpudica verba. —

non assis faciunt euntque recta:

nimirum sapiunt videntque magnam

matronae quoque mentulam libenter.

[XVIII]

Commoditas haec est in nostro maxima pene,

laxa quod esse mihi femina nulla potest.

[XX]

Fulmina sub Iove sunt; Neptuni fuscina telum;

ense potens Mars est; hasta, Minerva, tua est;

sutilibus Liber committit proelia thyrsis;

fertur Apollinea missa sagitta manu;

Herculis armata est invicti dextera clava:

at me terribilem mentula tenta facit.

[XXII]

Femina si furtum faciet mihi virve puerve,

haec cunnum, caput hic praebeat, ille nates.

[XXXV]

PRIAPEA

Pedicabere, fur, semel; sed idem
si pressus fueris bis, irrumabo;
quod si tertia furta molieris,
ut poenam patiari et hanc et illam,
pedicaberis irrumaberisque.

[LIV]

CD si scribas temonemque insuper addas,
qui medium volt te scindere, pictus erit.

[LXVII]

Penelopes primam Didonis prima sequatur
et primam Cadmi syllaba prima Remi,
quodque fit ex illis, tu mi depressus in horto,
fur, dabis: hac poena culpa luenda tua est.

[LXXIV]

Per medios ibit pueros mediasque puellas
mentula, barbatus non nisi summa petet.

PRIAPEA